

DÍDZA'DO' ZÍ'ALÖ BUZÚAJĚ JUAN

Didza' nabániru'

¹ Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi.

² Bönni' na' nabánigaca bönachi buluí'i lahuë', ate' bilé'etu' Lë'. Runtu' ba nalí queë', en rulu'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibudulu'í lahuë' ga zóaru'.

³ Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios.

⁴ Ruzúajtu' queéli' lu guichi lë ni para gaca udzëjaru' idú ládxi'ru'.

Dios náquië' bení'

⁵ Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rnna: Dios náquië' bení', ate' nitú le naca chul-la que dul-la' bití zóalen Lë'.

⁶ Channö innaru': "Nácaru' tuz len Dios", pero channö runru' le naca chul-la que dul-la', lë ni naca bë' rizi' yë'ëru', en bití' runru' le naca iduté li.

⁷ Na'a, channö runru' le naca tsahui', en ridarú' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a, en rugúa yúgu'të dul-la' nabága'ru'.

⁸ Channö rnnaru': "Biti' bi dul-la' runru'", rizi' yé'eru' la' cuínsiru', en biti' nazí' lu ná'aru' le naca idútë li.

⁹ Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugüë' yúgu'të le ruá' dö' dzaga rë'u.

¹⁰ Channö innaru': "Biti' bi dul-la' nabága'ru'", naca ca innaru': "Dios rizi' yë'ë", ate' biti' runru' ca rna xtídzë'ë.

2

Cristo náquië' Nu rudödi xtídza'ru' lahuë' Dios

¹ Libí'ili', zxi'ina'do', ruzúaja' queëli' lu guichi lë ni, para cabí gunli' dul-la'. Na'a, channö núti'tës nu gun dul-la', zoa nu rudödi xtídza'ru' lahuë' Dios Xuz, Lë' Jesucristo, Nu naca tsahui'.

² Naca cazë' Bönni' budödi cuinë', en gútië' para bugüë' dul-la' nabága'ru' lahuë' Dios. Calëgasö gútië' para bugüë' dul-la' nabága'ru' rë'u, pero gútië' ca' para bugüë' dul-la' nabága'gaca bönachi idútë yödzölió.

³ Channö runru' ca naca le gunná bé'enë' rë'u, nöziru' chinúnbë'ëru' Lë'.

⁴ Nu rna: "Neda' núnbë'a-në' Dios" pero biti' run ca rinná bë' xibá queë', nu ni rizi' yë', en biti' run le naca idútë li.

⁵ Nu run ca rnna xtídzëë Dios, le nácatë nadxí'i nu ni Dios ca ral-la' gun. Channö runru' caní, nõziru' néquiru' queë' Dios.

⁶ Lësca' caní, nu rnna: "Neda' néquida' queë' Cristo", ral-la' gaca nu na' ca na' gúquië' Cristo cate' gudë' yödzölió ni.

Tu xibá cubi

⁷ Böchi' luzá'ado', ruzúaja' queëli' lu guichi xibá ni. Biti' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyönili' dza ni'te.

⁸ Lësca' naca ca ruzúaja' queëli' lu guichi tu xibá cubi, lë na' le nácatë benë' Jesús ca rnna, ate' runli' ca' libí'ili' ca rnna, tu' chiridödi que le naca chul-la que dul-la', ate' bení' idú chiruzení'.

⁹ Nu rnna: "Zoa' lu bení'", pero biti' rilé'e dxi'a böchi' luzë'e, nu ni ni run le naca chul-la que dul-la'.

¹⁰ Nu nadxí'i böchi' luzë'e zoa lu bení', ate' le run ga nu ichixi inigui bití' zóalen nu na'.

¹¹ Le naca chul-la que dul-la' run ga nu bití' rilé'e dxi'a böchi' luzë'e, en ga ridá nu na' ga chul-la. Biti' nõzi ga zeaj, tu' run le naca chul-la na' ga nachul-la naniti nu na'.

¹² Ruzúaja' queëli' lu guichi, xzí'ina'do', tu' chibunít lahuë' Dios dul-la' nabága'li', tu' runë' le guzxí' lu në'ë gunë'.

¹³ Ruzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queëli' lu guichi, bi'i ra'bán, tu' chibucúl-lali' tu' xihui'.

¹⁴ Chibuzúaja' queëli' lu guichi, xzí'ina'do', tu' núnbë'ëli'-në' Dios Xuz. Chibuzúaja' queëli' lu guichi, libí'ili' nácali' xuz, tu' núnbë'ëli' Nu na'

zoa caz dza ni'te. Chibuzúaja' queëli' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzë'ë Dios, en chibucúl-lali' tu' xihui'.

¹⁵ Biti' idxí'sili' yödzölió ni, en calëga le dë yödzölió ni. Channö zoa nu nadxí'i yödzölió, bití' nadxí'i Dios Xuz.

¹⁶ Caní naca, tu' naca le tun bönachi yödzölió ni le cabí rë'ënë' Dios Xuz, pero naca le té'ëni bönachi yödzölió ni.

Tunë' le riyaza ladxi' yöl-la' bönáchisö quëgaquië'.

Tunë' le ruá' dö' le ridani guió'j lógaquië'.

Tun ba zxön cuíngaquië' ní'a que le dë quëgaquië'.

Caní nácagaca le ruá' dö' tunë'.

¹⁷ Huadödi que yödzölió ni, enca' que le ta'zë ládxi'gaca bönachi, pero nu run ca rë'ënë' Dios sóatica'sö.

Nu ruí'i didza' idútë li, en nu rizi' yë'

¹⁸ Zxí'ina'do', chizóaru' dza údxi, en ca na' chibiyónili' huidë' bönni' ridá'báguë'ë Cristo, lësca' na'a chigusí lo nacu'ë zían bönni' ta'dá'báguë'ë Cristo. Que lë ni na' nöziru' chizóaru' dza údxi.

¹⁹ Bila'rúajë' bönni' caní ládjaru', pero bití' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'rúajë' para gaca bë' bití' nácagaquië' yúgu'të' tuz len rë'u.

²⁰ Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të.

²¹ Buzúaja' queëli' lu guichi, tu' chinözili' le naca idútë li, en calëga tu' cabí nözili' le. Nözili' ca' bití' ca' rizi' yë' nu nözi le naca idútë li.

²² ¿Nuzxi caz na' nu rizi' yë'? ¿Naru' cabí naca nu na' ridá'baga' náquië' Jesús Nu gusól-lë'ë Dios? Naca nu ni bönni' ridá'báguë'ë Cristo,

tu' ridá'baguëë náquië' Dios Xuzë' Jesús, en ridá'baguëë ca' náquië' Jesús Zxí'inë' Dios.

²³ Núti'tës nu ridá'baga' Dios Zxí'ini, biti' ca' zóalenë' Dios Xuz nu na'. Núti'tës nu rnna yálajdo' Jesús náquië' Zxí'inë' Dios, lësca' zóalenë' Dios Xuz nu na'.

²⁴ Na'a, guli'güi' lataj le biyönili' dza ni'te ugá'analenticá'sö libí'ili'. Channö le biyönili' dza ni'te ugá'analenticá'sö libí'ili', lësca' libí'ili' ugá'analenticá'sili'-në' Dios Zxí'ini, enca' len Dios Xuz.

²⁵ Le guzxí' lu nëë Dios naca lë ni: Gunnë' gunnë' yöl-la' na'bán idú queëru'.

²⁶ Chibuzúaja' queëli' lu guichi lë ni ca naca quégaca nupa ta'zí' ye'e libí'ili'.

²⁷ Na'a, zóalenë' Dios Bö' Lá'ayi libí'ili'. Cristo gusöl-lëë Lë' queëli', ate' Lë' cazë' zóalenticá'së' libí'ili'. Que lë ni na' biti' riquínili' nu usedi libí'ili', tu' chizóalen Nu na' libí'ili', en rusedi libí'ili'. Didza' idútë li ru'é Lë', en biti' rizi' yëë. Ca na' chinzédali', guli'sóalenticá'së' Cristo.

²⁸ Na'a, zxí'ina'do', guli'sóalenticá'së' Cristo para cate' uluí'i lahuë' Lë', gácaru' rugu ladxi', en biti' utuí'iru' sóaru' lahuë' Lë' cate' huödë'.

²⁹ Channö nözili' náquië' Dios tsahui', ralla' inözili' ca' yúgu'të nupa tun le naca tsahui' nácacaga zxí'inë' Dios.

3

Nupa nácacaga zxí'inë' Dios

¹ Buli'yú ca nadxí'ide'enë' Dios Xuz rë'u, benë' ga nazí'i larú' zxí'inë' Dios caz. Que lë ni na' bönachi

yödzölió ni bití' ca' núnbë'gaca le nácaru', tu' cabí gulúnbe'e Jesús.

² Böchi' luzá'ado', na'a chinácaru' zxi'inë' Dios, en bití' naca bé'eni le ral-la' gácaru'. Nóziru' cate' uluí'i lahuë' Jesús, gácaru' ca náquië' Lë', ate' ilé'eru'-në' catëz náquië' Lë'.

³ Núti'tës nu run löza gaca ca náquië' Jesús, ruí'i ladxi' nu na' gaca dxi'a ca na' náquië' Jesús dxi'a.

⁴ Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá.

⁵ Nözili' buluí'i lahuë' Jesús para bugüë' dul-la' nabága'ru', en bití' bi dul-la' runë' Lë'.

⁶ Núti'tës nu dzaga Lë' bití' run dul-la'. Núti'tës nu run dul-la' catu caz bilé'e Jesús, en bití' núnbe'e Lë'.

⁷ Zxi'ina'do', guli'gún chi'i cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'.

⁸ Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' buduluí'i lahuë' Zxi'inë' Dios, para usunítië' yugu' le nun tu' xihui'.

⁹ Núti'tës nu naca zxi'inë' Dios bití' rúntica'sö dul-la', tu' zóaléntica'sö le guzxi' lu në'ë Dios Xuz nu na'.

¹⁰ Caní naca bë' nupa nácgaca zxi'inë' Dios, en nupa nácgaca zxi'ini tu' xihui'. Núti'tës nu bití' run le naca tsahui', en bití' nadxí'i böchi' luzé'e bití' nequi queë' Dios.

Ral-la' idxí'iru' yugu' böchi'ru' ta'yéajlë'ë Cristo

¹¹ Lë ni naca didza' biyönili' dza ni'te, le rnna: Ral-la' idxí'iru' luzá'aru' turu' ia'turu'.

¹² Bití' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx

que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

¹³ Böcha'ado', biti' ubánili' channö cabí ta'lé'e bönachi yödzülió ni libí'ili' dxi'a.

¹⁴ Nöziru' chigudödiru' lu yöl-la' guti, en chidë yöl-la' na'bán idú queëru' tu' nadxí'iru' yugu' böchi'ru'. Nu biti' nadxí'i böchi' luzë'e, chinati caz nu na'.

¹⁵ Núti'tës nu biti' rilé'e dxi'a böchi' luzë'e, naca huëti bönachi nu na', ate' nözili' nu ruti bönachi biti' dë yöl-la' na'bán idú que.

¹⁶ Caní núnbë'ëru' yöl-la' nadxí'i le naca idú. Naca ca budödë' Jesús yöl-la' na'bán queë', en gútië' uláz queëru'. Lësca' caní rë'u ral-la' udödiru' yöl-la' na'bán queëru', para gácalenru' yugu' böchi'ru'.

¹⁷ Na'a, núti'tës nu dë yöl-la' tsahui' que, lë na' dë yödzülió ni, ate' rilé'e böchi' luzë'e, bi riyadzaj queë', en biti' ruhuéchi' ladxi' lë', bi unödzej queë', ¿naru' nadxí'itsö nu na' Dios?

¹⁸ Libí'ili', zxí'ina'do', ral-la' idxí'iru' luzá'aru', calëga len dídza'sö o lu yöl-la' rinnësö queëru', pero idú ladxí'ru', enca' len idútë yöl-la' run queëru' ral-la' idxí'iru' luzá'aru'.

Le runru' löza lahuë' Dios

¹⁹⁻²⁰ Channö caní nadxí'iru' yugu' böchi' luzá'aru', nöziru' néquiru' que Nu na' naca idútë li, ate' lahuë' Dios huáca cö' dxi icja ladxí'do'oru' channö ruxösa ladxí'do'oru' rë'u, tu' rácada'arë' Dios ca ladxí'do'oru', ate' Lë' nözinë' yúgu'të.

²¹ Böchi' luzá'ado', channö cabí ruxösa ladxí'do'oru' rë'u, dë le runru' löza lahuë' Dios

22 tu' nöziru' gunnë' queëru' bítitës bi inábaru' lahuë'. Caní naca, tu' runru' ca rinná bë' xibá queë', en le raza ládxe'ë Lë'.

23 Lë ni naca xibá queë', para tséajlë'ëru'-në' Jesucristo, Zxí'inë' Dios, en idxí'iru' luzá'aru' ca na' chigunná bé'enë' rë'u.

24 Zóalen Dios nu run ca rinná bë' xibá queë', ate' Dios caz zóalenë' nu na'. Caní nöziru' dzáatica'së' Lë' rë'u, tu' chigusól-lë'ë Dios Bö' Lá'ayi queëru'.

4

Le naca bë' zóalenë' Dios Bö' Lá'ayi rë'u

1 Böchi' luzá'ado', bití' tséajlë'ëli' nútítës bönni' rnnë' zóalenë' Dios Bö' Lá'ayi lë', pero guli'sí' bë' bönni' na', channö zóalenë' Dios Bö' Lá'ayi lë', tu' ta'dë' zían bönni' ta'zí' yë'ë yödzölió ni. Ta'nnë' tu'ë didza' uláz queë' Dios.

2 Caní gúnbë'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rnnë' yálajdo' ca bidë' Jesucristo, Nu gusól-lë'ë Dios, rnnë' guca cazë' bönachi.

3 Lësca' caní, bití' nequi queë' Dios nu bönni' bití' rnnë' yalaj lulu ca bidë' Jesucristo, rnnë' bití' guca cazë' bönachi. Bönni' ni néquinë' que nu na' ridá'baga' Cristo, bönni' na' chibiyónili' ral-la' guidé', ate' na'a chiridé' yödzölió ni.

4 Zxí'ina'do', néquili' queë' Dios, en chibucúl-lali' nupa na' ta'zí' yë', tu' náparö Nu na' zóalen libí'ili' yöl-la' huáca unná bë' ca nu na' ridá yödzölió ni.

5 Légaquië' nácagaquië' bönachi yödzölió. Que lë ni na' tu'ë didza' que le naca que yödzölió, ate' bönachi yödzölió ni tu'zé nágagaca légaquië'.

⁶ Néquiru' rë'u queë' Dios. Nu nunbë' Dios ruzë nagui rë'u. Nu biti' nequi queë' Dios biti' ruzë nagui rë'u. Caní núnbë'ëru' nu na' yu'u le Bö' ruí'í didza' le naca idútë li, enca' nu na' yu'u le tu bö' rizí' yë'.

Náljalén Dios yöl-la' nadxí'i

⁷ Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' núti'tës nu nadxí'i luzë'e náljalén ca' Dios, en núnbe'e Dios.

⁸ Nu biti' nadxí'i luzë'e, biti' núnbe'e Dios, tu' náljalén Dios yöl-la' nadxí'i.

⁹ Caní bulu'e lahui Dios ca nadxí'inë' rë'u, gusöl-lë'ë la's dui Zxí'ini cazë' yödzölió ni, para gata' yöl-la' na'bán idú queëru' ni'a queë' Lë'.

¹⁰ Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inë' rë'u, en gusöl-lë'ë Zxí'ini cazë' para gútië', en caní bugúë' dul-la' nabága'ru'.

¹¹ Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'.

¹² Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ladxí'ru'.

¹³ Nöziru' zóalenru'-në' Dios, ate' Lë' zóalenë' rë'u, tu' guchízië' Dios Bö' Lá'ayi rë'u.

¹⁴ Netu' bilé'etu' le benë' Dios Xuz, en runtu' ba nalí que. Lë' gusöl-lë'ë Zxí'ini cazë' Nu rusólá bönachi yödzölió.

¹⁵ Nu bönni' rnnë' yálajdo' náquië' Jesús Zxí'inë' Dios, Dios zóalen cazë' bönni' na', ate' lë' zóalenë' Dios.

¹⁶ Rë'u ni nöziru', en réajlë'ëru' nadxí'inë' Dios rë'u. Yöl-la' nadxí'i náljalén Dios, ate' nu bönni'

nadxí'inë' luzé'ë, zóalenë' bönni' na' Dios, ate' Dios zóalenë' lë'.

¹⁷ Caní run dxin yöl-la' nadxí'i lu icja ládxi'do'oru', run ga bíti'rö rádxiru' dza ichúguië' Dios quégaca bönachi ilátigaca. Ca náquië' Jesús, nácaru' ca' rë'u yödzölió ni.

¹⁸ Channö nadxí'iru'-në' Dios, biti' bi gádxiru'. Cate' nadxí'iru'-në' Dios idú ládxi'ru', runë' ga biti' rádxiru'. Nu radxi, rigu'i rizáca'a. Nu na' radxi, biti' nadxí'i Dios idú ládxi'.

¹⁹ Rë'u ni nadxí'iru'-në' Dios, tu' zí'alö bidxí'i quézinë' Lë' rë'u.

²⁰ Channö nu inná: "Neda' nadxí'ida'-në' Dios", pero biti' rilé'e dxi'a böchi' luzé'e, nu ni rizí' yë'. Nu biti' nadxí'i böchi' luzé'e nu rilé'e caz, ¿naxi caz gaca idxí'i Dios, en catu caz bilé'e Lë'?

²¹ Caní gunná bé'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzé'e.

5

Ca gaca idéli'ru' lu le raca queëru' yödzölió ni

¹ Núti'tës bönni' réajlë'ë Jesús náquië' Cristo, náquië' zxí'inë' Dios, ate' núti'tës bönni' nadxí'inë' Dios Nu buzóa lë', ral-la' idxí'inë' ca' luzé'ë nu naca bi'i queë' Dios.

² Caní réquibe'eru' nadxí'iru' yugu' bi'i queë' Dios. Naca caní channö nadxí'iru'-në' Dios, en runru' ca rinná bé'enë' rë'u.

³ Caní naca bë' nadxí'iru'-në' Dios. Naca caní channö runru' ca rinná bé'enë' rë'u, ate' lë' na' rinná bé'enë' rë'u biti' naca böniga.

⁴ Núti'tës bönni' náquië' bi'i queë' Dios ridéli'në' lu le raca yödzölió ni. Chibidéli'ru' lu le raca yödzölió tu' réajlë'ëru'-në' Dios.

⁵ ¿Nuzxi na' rideli' lu le raca yödzölió? Run caní nu réajlë' náquië' Jesús Zxí'inë' Dios.

Dios Bö' Lá'ayi runë' ba nalí queë' Cristo

⁶ Caní blë'ë Jesucristo. Bidë' bidilë' nisa, en bulaljë' xichönë'. Calégasö bidilë' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idútë li didza' ru'ë Dios Bö' Lá'ayi.

⁷ Tsonna nupa tun ba nalí queë' Jesús yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonnë' ni nácagaquië' tuz.

⁸ Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná.

⁹ Channö si' lu ná'aru' le tun ba nalí bönachi, le runë' ba nalí Dios nácätërö lesaca'. Lë na' benë' ba nalí Dios naca le benë' ba nalí queë' Jesús, gunné' náquië' Zxí'ini cazë'.

¹⁰ Nu réajlë' Zxí'inë' Dios, nazí' lu në'e le nunë' ba nalí Dios. Nu cabí réajlë' Dios, naca ca rnna nu na': Dios rizí' yë'ë. Caní naca, tu' cabí guyéajlë' le benë' ba nalí Dios queë' Zxí'inë'.

¹¹ Lë ni naca le benë' ba nalí Dios. Gunnë' chibennë' yöl-la' na'bán idú queëru', ate' Zxí'inë' na' náquië' Nu nabániru' caní.

¹² Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' bití' zóalenë' Zxí'inë' Dios lë', bití' dë yöl-la' na'bán idú queë'.

Ca nöziru' dë yöl-la' na'bán idú queëru'

¹³ Libí'ili' na' réajlë'ëli'-në' Zxí'inë' Dios, ruzúaja' queëli' lu guichi lë ni para inözili' chidë yöl-la'

na'bán idú queéli', en para gaca idú ca réajlé'éli'-
nē' Zxí'inē' Dios.

¹⁴ Lē ni naca le ruzxöni ládxi'ru' Lē'. Channö bi inábiru' Lē' ca ré'ēnē' Lē', Lē' riyönnē' rē'u.

¹⁵ Channö nöziru' riyönnē' rē'u ca naca bi rinábiru' Lē', nöziru' ca' ideli' quéziru' lē na' rinábaru'.

¹⁶ Channö ilé'eru' böchi' luzá'aru' runē' dul-la' le cabí naché' yöl-la' guti, ral-la' inábaru' queē' lahuē' Dios, ate' Lē' unödzejē' yöl-la' na'bán queē'. Caní rnnía': Ral-la' inábali' quégaca nupa tun dul-la' le cabí naché' yöl-la' guti. Dē dul-la' le naché' yöl-la' guti. Biti' rnnía' inábali' que nu run dul-la' caní.

¹⁷ Yúgu'tē le cabí naca tsahui' naca dul-la', pero dē dul-la' le cabí naché' yöl-la' guti.

¹⁸ Nöziru' bití' rúntica'sö dul-la' nu naca zxí'inē' Dios, tu' rapa chí'ē Zxí'ini cazē' Dios nu na', ate' tu' xihui' bití' sequi' bi gun que.

¹⁹ Nöziru' yú'uru' lu nē'ē Dios, ate' yúgu'tē bönachi tu'í' ládxi'gaca le dē yödzölió ni yú'ugaca lu na' tu' xihui'.

²⁰ Na'a, nöziru' chibidē' Zxí'inē' Dios, en bennē' yöl-la' réajni'i queēru', para gúnbē'ēru' Nu na' naca idútē li. Zóalenru' Nu na' naca idútē li tu' zóalenru'-nē' Jesucristo, Zxí'inē' Dios. Nu ni naca Dios idú, en Nu runna yöl-la' na'bán idú queēru'.

²¹ Zxí'ina'do', guli'gún chí'í cuinli' para cabí tseaj ládxi'li' yugu' budó' guiöj budó' yaga. ¡Ca' gaca!

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25